

Regional News Unit AIR Aizawl  
Friday, April 12, 2024

**Time - 7:30 -7:40Hrs**

## **REGIONAL NEWS BULLETIN**

### **HEADLINES (MORNING)**

- Minister for External Affairs Dr S. Jaishankar chuan ram thenawm Myanmar tualchhung buaina avangin India himna atan inven hmasak a pawimawh a ti.
- Ambassador-Designate to Myanmar Pu Abhay Thakur an Champhai Dist tlawhin ramri kaltlanga thiltih hrang hrang a enfiah.
- Lok Sabha inthlanpui thawh 3-na, May ni 7-a vote thlak tur chungchang hriattirna chu vawiin hian tihchhuah a ni ang.

<><><>

### **UNION MINISTER**

Minister for External Affairs Dr S. Jaishankar chuan ram thenawm Myanmar tualchhung buaina avangin India himna atan inven hmasak a pawimawh a tih thu a sawi.

He thu hi Aizawl a kumin Lok Sabha inthlanpui atana an party manifesto 'BJP Mizoram Vision Document' nimina Aizawla a tlangzarhna-ah sawiin Union Minister chuan thenawm ram dinhmun thlirin India a him zel theih na'n lo inven chu hna hmasa-ah an nei a ti a. Thenawm ram a buai em avangin sorkar laipui chuan India leh Myanmar ramri hung a tum tih a sawi a, ram thenawm atangin thil tha lo tam tak leh ruihhlo a lo lut nasa a, hei hi ram thenawma thuneituten tha taka dan an kenkawh loh vang a ni tih sawiin tun dinhmunah chuan inven hmasak a pawimawh a ti. Myanmar dinhmunin zia-awm lam pan se ramri hung chu an ti dawn lo tih sawiin thil awmdan chuan that loh lam a pan zel avangin ramri hung a inven a pawimawh hmasa niin a sawi a ni.

Minister chuan tualchhung mi te chu Sawrkar laipui thil tih hrethiam tura chahin sorkar laipui chuan mipuite ngaihdan leh duhdan te leh an hnam ziarang te a ngaihsak reng a ti a, thenawm ramte nena in unauna pawh a ngaihtuah tih a sawi bawk.

Pu Jaishankar chuan India Act East Policy a hlawhtlin theih na'n theihtawp chhuah a ni a ti a. Myanmar ram dinhmunin zia-awm lam a pan theih loh avangin inbiakna a kal fuh theilo tih sawiin ram pahnih tana tha turin hmasawna a kal mek zel a ti a. ASEAN ramte'n hemi insumdawn tawna turin investment tih an inhuam tih sawiin sawhthing te pawh ngaih pawimawh zinga mi a ni a ti.

Minister chuan Myanmar nena insumdawn tawna a hlawhtlin theih nan hmalakna kalpui mek a ni a ti bawk a. Inthlan zawhah chak zawka a hlawhtlin theih na'n hmalak a ni dawn tih sawiin Bangladesh te nen pawha insumdawn tawna tur ngaihtuah a ni a ti a. Thalaite hmasawna tur leh hmeichhe hmasawna tur chu an ngaihtuah dawn tih sawiin an thiam thil hrang hrangte an hman tangkai theihna tur ruahman a ni dawn a ti bawk.

Pu Jaishankar chuan BJP Manifesto chungchang sawiin Mizoram in hriselna kawnga hma a sawn theih na'n Ayushman Bharat Card hmangin a thlawna in entir theihna cheng nuai 5 atanga cheng nuai 10 thleng mi tin hman theih turin a siam dawn a ti a. Mizorama damdawiin hrang hrang thuamthatna tur cheng vaibelchhe 1,000 dah bakah Zoram Medical College chu Regional Institute of Medical Science ah hlan chhoh an tum tih a sawi.

Minister chuan zirna an ngai pawimawh dawn tih sawiin sawrkar school thuan thatna turin cheng vaibelchhe 300 ruahman a ni a ti a, sawrkar college siamthat na'n cheng vaibelchhe 450 ruahman a ni tih a sawi a. Mizoram thalaite'n kut themthiamna lama hma an sawn theih na'n theihtawp chhuah an tum a ti a. Tunlai thiamna hmang thiam chung kutthemthiamna leh mahni kutkawih eizawna lama hmasawn tir chu an tum a ni tih a sawi.

Minister chuan kuthnathawktute'n hlawkna tam zawk an chan theih na'n dahkham ngai lo a awlsam tak cheng nuai 3 thleng a an puk theihna tur PM Kisan Niddhi Card nei zawng zawng te tan ruahman a ni a ti a. Mizorama Kuhva chingtute tharchhuah awlsam zawka an hralh theihna tur leh kuhva tawlhruk do a nih theih na'n Unique Identification siam ani ang a ti bawk.

<><><>

#### AMBASSADOR VISIT

Myanmar rama India palai (ambassador) mawhphurhna chelh tura ruat, Ambassador-Designate to Myanmar Pu Abhay Thakur, chuan nimin khan Champhai Circuit House-ah District official, tlawmngai pawlte leh ramri behchhana sumdawngte nena inkawmkhawmna buatsaihin, ramri dep khua Zokhawthar a tlawh nghal bawk.

Pu Abhay Thakur chuan Myanmar-a India ram palai hna a zawm hma a a kaihnhawih mi pawimawh tak takte nena inkawmhona hun tha tak hmanho a ni chu lawmawm a tih thu sawiin, ram pahnih inkarah inlaichinna tha a awm theih na'n tanrual a pawimawh a ni, a ti a. Ram himna leh hmasawna chu thil kalkawp tlat a nih avangin tun dinhmunah thil tih harsa rih mahse, nakin lawkah chuan ramri kaltlanga insumdawntawna leh hmasawna dangte pawh dan panggaia thawh leh theih a beisei thu a sawi a. Culture leh tourism chawisan kawnga thawhona, inkalpawhna kawngpui siam leh hmasawna ruhrel dangte pawh ngaih pawimawh a nih thu sawiin, ramri kaltlanga dan lova thil tih do kawngah theihtawp chhuah tlan a pawimawh thu a sawi a. Kalkhawmte chu zawh leh hriat duh an neihte bakah state leh central sawrkara thlen duh rawtna an neihte inthlahrung lova a hnena thlen turin a sawm a. Khawvel thang leh hmasawn zelah boruak inherdanglam dan thlir chung hmalak dan tur tha ber ngaihtuahho a tul thu a sawi bawk.

He hun kaihruitu District Bawrh sap Pu James Lalrinchhana chuan Champhai District chu ramri depa awm, district pawimawh tak a nih thu leh thenawm rambuai avangin raltlan awmna buk 23 a awm mek thu sawiin, sawrkar tha tichaktu tlawmngai pawl, Kohhran, pawl leh mimal tlawmngaiten nen theihtawp chhuaha buaipui an nih thu a sawi a. Ruihhlo do leh ven kawngah pawh thawhona tha tak neih a nih thu a sawi bawk a ni.

He hunah hian tlawmngai pawlte'n Free Movement Regime (FMR) tihtawp leh ramri hungte an do tlat thu an thlen a. Inkalpawhna kawngpui, raltlan chungchang, ramri a insumdawntawna, ramri kaltlanga ruihhlo tawlh ven chungchang leh pawimawh danga ngaihdan leh rawtna an neihte Ambassador-Designate to Myanmar hnenah hian an thlen bawk a ni.

Pu Abhay Thakur chuan inhmukhawm zawh hnu hian Zokhawthar tlawhin ramri kaltlanga insumdawntawna leh hemi kawnga hmalaknate enfiain a zir Chiang a. Land Customs Station Zokhawthar, Immigration Check Post leh Assam Rifles COB Zokhawtharte a tlawh a, hemi hnu hian Aizawl panin a let leh a ni.

<><><>

## **POLL NOTOFICATION**

Lok Sabha inthlanpui thawh 3-na, May ni 7-a vote thlak tur chungchang hriattirna chu vawiin hian tihchhuah a ni anga, State 10 leh Union Territory a seat 94 ah inthlan a ni dawn a ni.

Hemi rual hian Madhya Pradesh a candidate thi awmna Betul biala inthlan sawnsak pawh vawiin hian hriattirna chhuah a ni ang.

Inthlan chuh tumte tan hian ni 19 thleng hun hawn a ni.

<><><>

## **KHAWZAWL**

Khawzawl Tuisenphai NH-06-a District Check Gate chu Khawzawl Bawrsap Pu K. Lalrohlua niman khan a tlawh a. He Check Gate hi Covid hripui len hun laia khawtlang leh sawrkar department hrang hrang ten Khawzawl DC kaihhruaina hnuai an siam a ni a, Khawzawl District Executive Force (SP Office) ten an enkawl zui ta a ni.

Khawzawl SP Pu Lalchhuanthanga ngenna angin Check Gate-ah hian CCTV dah (install) fel a ni a, dah anih ni vekah hian Bawrsap Pu K. Lalrohlua chuan a enfiah nghal a ni. Bawrsap hian Lok Sabha Inthlanpui puala Check Gate-a CCTV dah chu a hnu zelah pawh a tangkai hle dawn a ni, a ti a, Police te chu CCTV chu tangkai taka hmang tura duhsakna hlanin, ram dan zawm lote chungah hma lakna atan tangkai taka an hman a duh thu a sawi bawh a ni.

<><><>

## **ZPM LEGAL DEPT.**

Rorellai ZPM Legal Department chuan an party Lok Sabha candidate Pu Richard Vanlalhmangaiha tihmingehhia a inthlanna a a tlak theihna atana beitung lakah thubuai siamsak turin an buaipui mek niin an sawi.

Nimina chanchinbumite an kawmna-ah ZPM Legal department general secretary Pu Vanlalsiama Pachua chuan youtube channel pakhat neitu Tuesday Nightmare inti leh social media a helam sawi chhuaktu David Sailo intite lakah thubuai siamsak an tum thu a sawi a. Inthlan vote thlak hma ngei a thubuai siamsak an tum thu a sawi. ZPM hruaitute chuan hemite pahnih hian kum 2011 leh 2012 bawr vela MAMCO Deputy Manager (Marketing) Pu Lalremthanga leh MAMCO Consultant ni a chhal Mustaqur Rahman, Guwahati te'n Contract hna pek chungchanga inbumna case chin fel tawh, hremna pawh pek tawh kaihhnawihah ZPM MP Candidate sawi luh ve talh an tum niin an puh a. Court-in he thubuai hi a chingfel tawh a, a inhnawihawite pawh a hrem tawh a. Court in a ngaihtuah ve zingah pawh tel lo ZPM Lok Sabha candidate tihming chhiat tumna liau liau a ni, an ti a ni.

MAMCO lam intiamkamna lehkha-ah chuan MAMCO Account-a sum lut ngei tur anga tarlan a ni, an ti a. Chumi avang chuan Assistant Manager a nihna angin Pu Richard Vanlalhmangaiha khan a hming a ziak ve ngei tur pawh a ni a. Amaherawhchu, sum luhna erawh MAMCO lam Account-ah ni lovin, court-in thiam loh a chantir tak Pu Lalremthanga leh Mustaqur Rahman account lamah a lo lut leh dah a ni tih hi ACB te hian an chhuichhuak leh vek a ni, an ti a. Pawisa vir vel dan zawng zawng chiang zawk a hre duh tan chuan Court Judgement leh Order ah chiang taka tarlan a ni a. Affidavit-a hming sign chungchangah hian Pu Richard Vanlalhmangaiha hi bum tel a ni ve zawk a ni, an ti a ni.

<><><>